

113 學年度石碇高級中學語文競賽校內選拔 閩南語朗讀 - 高中組

01. 阿媽的 kha-báng¹

余韶瑋

過年前兄弟姊妹做伙轉去舊厝摒掃，拄入門看著掛佇壁堵彼張阿媽的舊相片，予我想起細漢的時，阿媽三不五時會來阮兜蹓幾工，才閣轉去庄跤。毋過自從阿公過身後，阿爸煩惱阿媽一個人跔庄跤無人通好照顧，就共阿媽接入來市內。

聽講阮公族仔佇地方上誠有名望，阿公自做囡仔的時就毋捌為錢煩惱，所致結婚了後伊嘛攏無咧做工課。是講金山銀山死坐活食嘛會空，阿媽自嫁來這個家就誠拚勢，日時愛去田裡作穡，暗時轉來閣愛款厝內的大細項代誌。因為生活的重擔，致使伊食老變甲曲痾曲痾。

伊揸彼跤細跤 kha-báng 跔樓梯的形影，我一直無法度放袂記得。我捌偷偷仔覷佇門邊，看阿媽共 kha-báng 開開，內底干焦因幾領平常時仔通替換的衫仔褲，恰一張阿公少年時所翕的相片。伊定定會坐佇眠床邊暗暗仔流目屎，我共阿媽問講：「阿媽你人無爽快，是無？」雖罔伊攏會共我講：「戇孫的，阿媽人無代誌，彼是食老咧流目油啦！」毋過我知影，彼是因為伊離開生活幾若十冬的故鄉，恰心悶阿公所流落來的目屎。

阿媽一冬攏會來阮兜蹓兩三個月，逐擺月底猶未到，阿媽攏會提早共包袱仔款好勢，聽候日拆頂面的時間到矣，就會叫阿爸載伊去高雄二伯伢兜。阿爸攏會共阿媽唸講：「佇嘉義蹓甲好勢好勢，是按怎一定著愛按呢摔跋反啦？」毋過阿媽嘛是攏會堅持愛阿爸載伊去，若無，伊就會受氣，幾若工無愛插阿爸。

阿媽佇四个後生的厝內輪流蹓，彼跤 kha-báng 嘛綴伊佇高雄恰嘉義來來去去。大漢了後，我沓沓仔會當理解，是按怎阿媽會遐爾堅持咧？毋是因為阿爸、阿母對阿媽無夠好，應該是阿媽驚外口人誤會伊倚孤人，是毋是其他的囡兒序細對伊無有孝，才會遐爾堅持欲徙岫。彼跤 kha-báng 陪伊行人生最後的路途，內底所貯的毋但是衫仔褲，嘛是做人爸母替後生、查某团設想的愛。

¹ 閩唸做 khâ-báng

113 學年度石碇高級中學語文競賽校內選拔 閩南語朗讀 - 高中組

02.我上難忘的風景

拾可慕¹

我毋是一个愛出門的人，平常時散學轉到厝就算無代誌通做，嘛袂想欲出門四界遨。歇暍日有閒的時陣，猶原干焦想欲規日鬱佇厝內。規年當中大概干焦歇寒恰歇熱的家族旅遊，會當予我踏出阮兜，去外面行跤花、四界看看咧。自細漢到今算起來，綴逐家出門迤迤嘛袂少遍，已經袂記得到底去過偌濟所在，毋過總是有一寡風景予我印象足深，若像情景就佇眼前。

有一擺，我拄想講欲趕緊共宿題完成，通好佇厝裡看小說抑是耍手機仔，煞予想欲出門迤迤的阿母半揀半揀，去行步道。雖罔我起毛標，落尾嘛是做伙行，共耳機掛起來，三步做兩步，行佇逐家的頭前遠遠遠，干焦想欲較緊行到盡尾好通看冊。毋過當當我沉迷佇音樂優美的旋律，雄雄一陣好聽的鳥仔聲迴過耳機鑽入來我的雙耳，我就按呢共耳機提落來，越頭四界看，想欲揣鳥仔聲是對佗位來的。毋過這陣嘛發覺著，拄才好聽的聲毋知底時完全消失去矣。恬 tsih-tsih 的樹林內干焦睹有若無的鳥仔聲，我目睺金金佇樹林內四界貓貓看，揣甲額頸仔痠，猶原揣袂著聲音美妙的鳥仔。

雖然無法度知影鳥仔聲是對佗位來，但是煞予我注意著步道四箍輾轉的景緻。路邊有規排的變葉木，彩色的葉仔烏點紅蔭茄仔色、青翠翠透濫頓點青、黃錦錦淡柑仔色，目睺前五彩的色緻予我看甲無瞞目。四常看袂上目的樹仔，其實逐樣都有小可仔無全，就算是葉仔，色水嘛有精差，有一寡閣會濫無全的嬌色。斟酌看，鵲鵲遶的枝葉內，有的生一掬一掬烏幼的樹子，抑是幼屑屑的花蕊，看著實在足得人疼，予人想欲挽閣毋甘。

向時所看見的風景，猶原若親像佇眼前，規个面感受著微微仔風吹過來，耳空內聽著鳥仔聲樂暢的感覺，可能因為彼時單獨一人佇林內無別人攪吵，予我完全感受著樹林仔展現的一切。嘛可能是我傷少出門，罕得接近大自然，才會共這個光景深深刻佇頭殼內，永遠難忘。

¹ 拾可慕(Síp Khó-bōo)